




水經卷第十六

漢桑欽撰

後魏酈道元注



穀水

甘水

漆水

滄水

沮水



穀水出弘農黽池縣南潘塚林穀陽谷

山海經曰傳山之西有林焉曰潘塚穀水出焉東

流注于洛其中多珉玉今穀水出于嶠東馬頭山

穀陽谷東北流歷黽池川本中鄉地也漢景帝三

年初徙萬戶為因嶠黽之池以目縣焉亦或謂之

彭池故徐廣史記音義曰黽或作彭穀水處也穀

水又東逕秦趙二城南司馬彪續漢書曰赤眉從

黽池自利陽南欲赴宜陽者也世謂之俱利城者

嘑曰昔秦趙之會各據一城秦王使趙王鼓瑟藺相如今秦王擊缶處也馮異又破赤眉於是川矣故光武璽書曰始雖垂翅回溪終能奮翼澗池可謂失之東隅收之桑榆矣穀水又東逕土嶠北所謂三嶠也穀水又東左會北溪溪水北出龜池山東南流注于穀疑即孔安國所謂澗水也穀水又東逕新安縣故城南北夾流而西接嶠龜昔項羽西入秦坑降卒二十萬於此國滅身亡宜矣穀水入東逕千秋亭南其亭累石爲垣世謂之城也潘岳西征賦曰亭有千秋之號子無七旬之期謂是亭也又東逕于雍谷溪回岫縈紆石路阻峽故亦有峽石之稱矣晉大歷側左與北川水合水有二

源並導北山東南流合成一水自乾注巽入于穀穀水又東逕缺門山山阜之不接者里餘故得是名矣二壁爭高斗聳相亂西瞻雙阜右望始低穀水自門而東廣陽川注之水出廣陽北山東南流注于穀南望微山雲峯相亂穀水又逕白超壘南戴延之西征記云次至白超壘去函谷十五里築壘當大道左右有山夾至相去百餘步從中出北乃故關城非所謂白超壘也是壘在缺門東一十五里壘側舊有塢故治官所在魏晉之曰引穀水爲水治以經國用遺跡尚有穀水又東石默溪水出微山東麓石默溪東北流入于穀穀水又東宋水北流注于穀穀水又東逕魏將作大匠毋丘興

盛墓南二碑存焉儉父也管輅別傳曰輅嘗隨軍
四征過其墓而歎謂士友曰玄武藏頭青龍無足
白虎衝尸朱雀悲哭四危已備法應滅族果如其
言穀水又東逕函谷關南東北流皂澗水注之水
出新安縣東南流經母丘與盛墓東又南逕函谷
關西關高峻峽路出屢郭漢元鼎三年樓船將軍
楊僕數有大功耻居關外請以家僮七百人築塞
徙關於新安即此處也昔郭丹西入關感慨於其
下曰不乘駟馬高車終不出此關也去家十二年
果如志焉皂澗水又東流入于穀穀水又東北逕
函谷關城東右合桑爽之水山海經曰白石山西
五十里曰穀山其上多穀其下多桑爽之水出焉

世謂之紵麻澗北流注于穀山海經曰其中多碧
穀水又東澗水注之山海經曰婁涿山西四十里曰
白石之山澗水出焉北流注于穀自下通謂之澗
水爲穀水之兼稱焉故尚書曰伊洛瀍澗既入于
河而無穀水之目是名亦通稱矣劉澄之云新安
有澗水源出北縣又有淵水未知其源余考諸地
記並無淵水但淵澗字相似時有字錯爲淵也故
闕駟地理志曰禹貢之淵水是以知傳寫書誤字
謬舛真證之不思所致耳旣無斯水何源之可求
乎穀水又東波水注之山海經曰瞻諸山西三十
里婁涿之山無草木多金玉波水出于其陰也謂
之百荅水北流注于穀山海經曰其中多荅石文

石穀水又東少水注之山海經曰廆山西三十里
曰瞻諸之山其陽多金其陰多文石少水出于其
陰控引衆溪積以成川東流注于穀世謂之慈澗
也穀水又東俞隨之水注之山海經曰平蓬山西
十里廆山其陽多璵璠之玉俞隨之水出于其陰
北波注于穀世謂之孝水也潘岳西征賦曰澡孝
水以濯纓嘉美名之在茲是水在河南城西十餘
里故呂忱曰孝水在河南而戴延之言在函谷關
西劉澄之又六出擅山擅山在宜陽縣西在穀水
南無南入之理考尋茲說當承緣生述征謬誌耳
緣生從戍行旅征途訊訪既非舊土故無所究今
川瀾北注澄映泥濘得言枯涸也皆爲䟽僻矣

東北過穀城縣北

城西臨穀水故縣取名焉穀水又東逕穀城南不
歷其北又東逕洛水枝流入焉今無水也

又東過河南縣北東南入于洛

河南城西北穀水之右有石磧磧南出爲死穀北
出爲湖溝魏太和七年暴水流高三丈此地下停
流以成湖渚造溝以通水東西十里決湖以注漚
水穀水又逕河南王城北所謂成周矣公羊曰成
周者何東周也何休曰名爲成周者周道始成王
所都也地理志曰河南河南縣故邾鄆地也京相
璠曰邾山名鄆地邑也十年定鼎爲王之東都謂
之新邑是爲王城其城東南名曰鼎門蓋九鼎所

從入也故謂是地爲鼎中楚子伐陸渾之戎問鼎於此述征記曰穀洛二水本於王城東北合流所謂穀洛關也今城之東南缺千步世又謂之穀洛關處俱爲非也余按史傳周靈王之時穀洛二水關毀王宮王將塌之太子晉諫王不聽遺堰三堤尚存左傳襄公二十五年齊人城邾穆叔如周賀韋昭曰洛水在王城南穀水在王城北東入于漚至靈王時穀水盛出於王城西而南流合於洛兩水相格有似於關而毀王城西南也穎客之著春秋條例言西城梁門枯水處世謂之死穀是也始知緣生行中造次入關經究故事與實違矣考王封周桓公於是爲西周及其孫惠公封少子於鞏

爲東周故有東西之名矣秦滅周以爲三川郡項羽封申陽爲河南王漢以爲河南郡王莽又名之曰保忠信鄉光武都洛陽以爲尹尹正也所以董正京畿率光百郡也穀水又東流逕乾祭門北子朝之亂晉所開也東至千金塌河南十二里境薄曰河南縣城東十五里有千金塌洛陽記曰千金塌舊堰穀水魏時更修此堰謂之千金塌積石爲塌而開溝渠五所謂之五龍渠渠上立塌塌之東首立一石人石人腹上刻勒云太和五年二月八日庚戌造築此塌更開溝渠此水衡渠上其水助其堅也必經年歷世是故部立石人以記之云爾蓋魏文帝修王張故績也塌是郡水使者陳協所

造也語林曰陳協數進阮步兵酒後晉文王欲脩九龍堰阮舉協文王用之掘地得古承水銅龍六枚堰遂成水歷竭東注謂之千金渠遠于晉世大水暴注溝瀆泄壞又廣功焉石人東脇下文云太始七年六月二十三日大水并瀑出常流上三丈蕩壞二竭五龍泄水南注瀉下加歲久漱齧每澇卽壞歷載消棄大功今故爲令遏更於西開泄名曰伐龍渠地形正平誠得爲泄至理千金不與水勢激爭無緣當壞由其卑下水得輪上漱齧故也今增高千金於舊一丈四尺五龍自然必歷世無患若五龍歲久復壞可轉於西更開二竭二渠合用二十三萬五千六百九十八功以其年十月二十三日起作功重人少到八年四月二十日畢代龍渠卽九龍渠也後張方入洛破千金竭公私賴之水積年渠竭頽毀石砌殆盡遺基見存朝廷太和中修復故竭按千金竭石人西脇下文云若溝渠久踈深引水者當於河南城北石磧西更開渠北出使首孤立故溝東下因故易就磧堅便時事業已訖然後見之加邊方多事人力苦少又渠竭新成未患於水是以不敢預修通之若於後當復興功者宜就西磧故書之於石以遺後賢矣雖石磧淪敗故跡可憑准之於文北引渠東合舊瀆舊瀆又東晉惠帝造石渠於水上按橋西門之南頰文稱晉元康二年十一月二十日改治石巷水門

除堅枋更爲函枋立作覆枋屋前後辟級續石障使南北入岸築治漱處破石以爲殺矣到三年三月十五日畢記并紀列門廣長深淺于左右巷東西長七尺南北龍尾廣十二丈巷瀆口高三丈謂之畢門橋又潘岳西征賦曰秣馬畢門即此處也穀水又東又結石梁跨水制城西梁也穀水又東左會金谷水水出大白原東南流歷金谷謂之金水東南流逕晉衛尉卿石崇之故居也石季倫金谷詩集叙曰余以元康七年從太僕出爲征虜將軍有別廬在河南界金谷澗中有清泉茂樹衆果竹栢藥草蔽翳渭水又東南得歷泉水北歷泉溪東南流注于渭渭水又東南出橋西亭西又南得

籍水口水出西山百澗聲流惣成一川東歷當亭川卽當亭縣治也左則當亭水注之右則曾席水又東與大弁川水出西山二源合注東歷大弁川東南流注于籍水籍水又東南流與竹嶺水合水出南山竹嶺二源同瀉東北入籍水籍水又次東北入上邽縣左佩五水東會占溪水次東有大魯溪水次東得小魯谷水次東有楊反谷水咸自北山注離注籍水籍水右帶五水竹嶺東得亂石溪水次東得木門谷水次東得羅城溪水次東得山谷水皆道源南山北流入籍水籍水又東黃瓜水注之其水發源黃瓜西谷東流逕黃瓜縣北又東清溪白水左右夾注又東北大旱谷水南出旱溪

歷澗北流泉溪委漾同注黃瓜水黃瓜水又東北
歷赤合咸歸于籍籍水又東得毛泉谷水又東逕
上邽城南得覈泉水並出南山北流注于籍籍水
即泮水也北西北角築之謂之金墉城魏文帝起
層樓於東北隅晉宮閣名曰金墉有崇天堂卽此
地上架水爲榭故曰樓矣皇居創徙宮極未就止
蹕於此構宵榭於故臺所謂臺以停停也南曰乾
光門夾建兩觀觀下列朱桁於塹以爲御路東曰
含春門北有退門城上西面列觀五十步一睥睨
屋臺置一鍾以和漏鼓函北連廡蔭墉北廣榭炎
夏之日高視常以避暑爲淥水池一所在金墉者
也穀水逕洛陽小城北因阿舊城憑結金墉故向

地也永嘉亂結以爲壘號曰洛陽壘故洛陽記曰
陵雲臺西有金市金市北對洛陽壘者也又東歷
大夏門下故夏門也陸機與弟書云門有三層高
百尺魏明帝造門內東側際城有魏文帝所起景
陽山餘基尚存孫盛魏春秋曰黃初元年文帝愈
崇宮殿雕飾觀閣取白石英及紫石英及五色大
石於太行穀城之山起景陽山於芳林園樹松竹
草木捕禽獸以充其中于時百役繁興帝躬自掘
土率群臣三公已下莫不展力山之東舊有九江
陸機洛陽記曰九江直作真水水中作真壇三破
之夾水得相逕通賦曰濯龍芳林九谷八溪芙蓉
覆水秋蘭被崖今也山則塊阜獨立江無復髣髴

矣渠水又東枝分南入華林園歷踈圃南圃中有古玉井井悉以珉玉爲之以緇石爲口玉作精密猶不變古璨焉如新又遙華宮南歷景陽山北山在都亭堂上結方湖湖中起御坐石也御坐前建蓬萊山曲池接筵飛沼拂席南面射侯夾席武峙背山堂上則石路崎嶇巖嶂峻嶮雲臺風觀纓巒帶阜逕觀者升降耶閣出入虹陛望之狀島沒鸞舉矣其中引水飛翠傾瀾瀑布或枉渚聲溜潺湲不斷竹栢蔭於層繡薄叢於泉側微颺暫拂則芳溢於六空入爲神居矣其水東生天淵池池中有魏文帝九花叢殿基悉是洛中故碑累之今造釣臺於其上池南置魏文帝茅茨堂前有茅茨碑

是黃初中所立也其水自天淵池東出華林園逕聽訟觀南故平望觀也魏明帝常言獄天下之命也每斷大獄恒幸觀聽之以太和三年更從今名觀西北接華林隸薄音劉禎磨石處也文士傳曰文帝之在東宮也宴諸文學酒酣命甄后拜坐坐者咸伏唯劉禎平仰觀之太祖以爲不敬送徒隸薄後太祖乘步牽車乘城降關薄作諸徒咸敬而禎摠坐磨石不動太祖曰此非劉禎也石如何性禎曰石出荆山玄巖之下外炳五色之章內秉賢貞之志雕之不增文磨之不加瑩稟氣真正稟性自然太祖曰名豈虛哉復爲文學池水又東流于洛陽縣之南池池即故狄泉也南北百一十步東

西七十步皇甫謐曰悼王葬景王於翟泉今洛陽太倉中大冢是也春秋定公元年晉魏獻子合諸侯之大夫于翟泉始盟城周班固服虔皇甫謐咸言翟泉在洛陽東北周之墓地今按周威烈王葬洛陽城內東北隅景王塚在洛陽太倉中翟泉在兩塚之間側廣莫門道東建春門路北路卽東宮街也於洛陽爲東北後秦封呂不韋爲洛陽十萬戶侯大其城并得景王冢矣是其墓地也及晉永嘉元年洛陽東北步廣里地陷有二鵝出蒼色者飛翔冲天白色者止焉陳留孝廉董養曰步廣周之狄泉盟會之地今色倉胡象矣其可盡言乎後五年劉曜王彌入洛帝居平陽陸機洛記曰步廣

里在洛陽城內宮東是狄泉所在不得於太倉西南也京相璠與裴司空彥季脩晉輿地圖作春秋地名亦言今太倉西南池水名狄泉又曰舊說言秋泉本自在洛陽北長弘成周乃繞之杜預因其一證必是狄泉而卽實非也後遂爲東宮池晉中州記曰惠帝爲太子出聞蝦蟇聲問人爲是官蝦蟇私蝦蟇侍臣賈胤對曰在官地爲官蝦蟇在私地爲私蝦蟇令曰若官蝦蟇可給稟先是有識云蝦蟇當貴昔晉朝收愍懷太子於後池卽是池也其一水自大夏門東逕宣武觀憑城結構不更層墉左右夾列步廊參差翼跂南望天淵池北矚宣武場竹林七賢論曰王戎幼而清秀魏明帝於宣

武場上爲欄苞虎阱使力士袒裼迭與之搏縱百
姓觀之戎年七歲亦往觀焉虎承門薄欄而吼其
聲震地觀者無不辟易顛仆戎亭然不動帝於門
上見之使問姓名而異之場西故賈充宅地穀水
又東逕廣莫門北漢之穀門也北對芒阜連嶺脩
亘苞惣衆山始自洛口西踰平陰悉芒龍也魏志
曰明帝欲平北芒令登臺見孟津侍中辛毗諫曰
若九河溢涌洪水爲害丘陵皆夷何以禦之帝乃
止穀水又東出屋南逕建春門石橋下卽上東門
也阮嗣宗詠懷詩曰步出上東門者也一曰上升
門晉曰建陽門百官志曰洛陽十一門候一人六
百石東觀漢記曰邳惲爲上東門候光武嘗出夜

還詔開門欲入惲不內上令從門間識面惲曰火
明遼遠遂拒不開由是上益重之亦袁本初桂節
處也橋首建兩石柱橋之右柱銘云陽嘉四年乙
酉壬申詔書以成下漕渠東通河濟南引江淮方
貢委輸所由而至使中謁者魏郡清淵馬憲監作
石橋梁柱敦勅工匠盡要妙之巧攢立重石累高
周距橋工路博流通萬里云云河南尹邳崇隗承
渤海重合雙福水曹掾中牟任防史王蔭史趙興
將作吏睢陽申翺道橋掾成罕國洛陽令江雙
丞平陽降監掾王騰之主石作左北平山仲三月
起作八月畢成其水依柱文自樂里道屈而東出
陽渠昔陸機爲成都王穎入洛敗此而返水南卽

馬市也舊洛陽有三市斯其一也嵇叔夜爲司馬昭所害處也北則白社故里也昔孫子荆會董咸輦於白社謂此矣以同載爲榮故有威輦啣又東逕馬市石橋橋南有二石柱並無文刻也漢司空漁陽王梁之爲河南也將引穀水以溉京都渠成而水不流故以坐免後張純堰洛而通漕洛中公私懷瞻是渠今引穀水蓋純之創也按陸機洛記劉澄之永初記言城之西面有場渠周公制之也昔周遷殷氏于洛邑城隍褊狹卑陋之所耳晉故城成周以居敬土秦又廣之以封不韋以是推之非專周公可知矣亦謂之九曲瀆故河南十二縣簿云九曲瀆在河南鞏縣西西至洛陽又按傳暢晉書云都水使者陳狼鑿運渠從洛口入注九曲至東陽門是以阮嗣宗詠懷詩所謂朝出上東門逕望首陽基又言遥遥九曲間徘徊欲何之者也陽渠南水南暨閭闔門漢之上西門者也漢官記曰上西門所以不純白者漢家戶於戍故以丹鏤之太和遷都徙門南側其水北乘高渠枝分上下歷故石橋東入城逕望先寺中有碑碑側法子丹碑作龍矩勢於今作則佳方古猶劣渠水又東歷故金市南直千秋門右宮門也又枝流入石逗伏流注靈芝九龍池魏太和中皇都遷洛陽經構宮極修理街渠務窮隱發石視之嘗無毀壞之石工細密非今知所擬亦竒爲精至也遂因用之其一

水自千秋門南流逕神虎門下東對雲龍門二水
衡楸之上皆列龍雲風虎之狀以犬齊薄之及其
晨光初起夕景斜輝霜文翠照陸離眩目又南逕
通門掖門西又南流東轉逕閭闔門南案禮王有
五門謂臯門庫門雉門應門路門路門一曰畢門
亦曰虎門也魏明帝上法太極於洛陽南宮起太
極殿于漢崇德殿之故處改雉門爲閭闔門昔在
漢世洛陽宮殿門題多是大篆言是蔡邕諸子自
董卓焚宮殿魏太祖平荊州漢吏部尚書安定梁
孟皇蓋師宜官八分體求以贖死太祖善其法常
仰繫帳中愛翫之以爲勝宜官北宮旁題咸是鵠
筆南宮旣建明帝令侍中京兆韋誕以古篆書之
皇都遷洛始令中書舍人沈舍馨以隸書書之景
明正始之年又勅符節令江式以大篆易之今諸
桁榜題皆是式書周官太宰以正月懸治法於象
魏廣雅曰闕謂之象魏風俗通曰魯昭公設兩觀
於門是謂之闕從門厥聲爾雅曰觀謂之闕說文
曰闕門觀也漢官典職曰偃師去洛四十五里望
朱雀闕其上鬱然與天連是明峻極矣洛陽故宮
名有朱雀闕白虎闕蒼龍闕北闕南宮闕也東觀
漢記曰更始發洛陽李松奉引車馬莽觸北闕鐵
柱門三馬皆死即斯闕也白虎通曰門必有闕者
何闕者所以飾門別尊卑也今閭闔門外夾建巨
闕以應天宿雖不如禮猶象而魏之上加復思以

易觀矣廣雅曰復思謂之屏釋名曰屏自障屏也
寧思在門外寧復也臣將入諸事於此復重思之
也漢末兵起壞園陵寧思曰無使民復思漢也故
鹽鐵論曰垣闕寧思言樹屏隅角所架也穎客又
曰闕者上有所失下得書之於闕所以求論譽於
人故謂之闕矣今闕前水南道右置登聞鼓以納
諫也昔黃帝立明臺之議堯有衢室之問舜有告
善之旌禹有立鼓之訊湯有總街之誹武王有靈
臺之復皆所以廣設過悞之備也渠水又枝分夾
路南逕出太尉司徒兩坊間謂之銅駝街舊魏明
帝置銅駝諸獵於閭闔南街陸機云駝高九尺積
出太尉坊者也水西有永寧寺熙平中始創也作
九層浮圖浮圖下基方一十四丈自金露柱下至
地四十九丈取法代都七級而又高廣之雖二京
之盛五都之富利剝靈圖未有若斯之構按釋法
顯行傳西國有爵離浮圖其高與此相狀東都西
域俱爲莊妙矣其地是曹爽故宅經始之日於寺
院西南隅得爽窟室下入土可丈許地壁悉累方
石砌之石作細密都無所毀其石悉入法用自下
曹爽庸匠亦難復制此桓氏有言曹子丹生此勝
犢信矣渠左是魏晉故廟地今悉民居無復遺墉
也渠水又西歷廟社之間南注南渠廟社各以物
色辯方周禮廟及路寢皆如明堂而有燕寢焉唯
祧廟別無後代通爲一廟列正室於下無復燕寢

之制禮天子建國左廟右社以石爲主祭則希冕
今多王公攝事王者不親拜焉咸寧元年洛陽大
風帝社樹折青氣屬天元王東渡魏社代昌矣渠
水自銅駝街東逕司馬門南魏明帝始築闕崩壓
殺數百人遂不復築故無闕門南屏中舊有置銅
翁仲處金狄旣淪故處亦禡唯壞石存焉自此南
直宣陽門經緯通達皆列馳道往來之禁一同兩
漢曹子建嘗行御街犯門禁以此見薄渠水又東
逕杜元凱所謂狄泉北今無水坎方九丈六尺深
二丈餘似是人工而不類於泉陂是驗非之一證
也又皇甫謐帝王世紀云王室定遂徙居成周小
不受王都故壞翟泉而廣之泉源旣塞明無故處

是驗非之二證也杜預言翟泉在太倉西南旣言
西南於維陽不得爲東北是驗非之三證也稽之
地說事幾明矣不得爲狄泉也渠水歷司空府前
逕太倉南東出陽門石橋下注陽渠穀水自閭闔
而南逕上山東水西三里有坂坂上有土山漢大
將軍梁冀所成築土爲山植林成苑張璠漢記曰
山多峭坂以象二嶠積金玉採捕禽獸以充其中
有人殺苑兔者迭相尋逐死者十三人南出逕西
陽門舊漢氏之西明門也亦曰雍門矣舊門在南
太和中以故門卯出故徙是門東對東陽門穀水
又南逕白馬寺東是漢明帝夢見大人金色項佩
白光以問群臣或對曰西方有神名曰佛形如陛

下所夢得無是乎於是發使天竺寫致經像始以榆欂成經白馬負圖表之中夏故以白馬爲寺名此榆欂後移在城內愍懷太子浮圖中近世復遷此寺然金光流照法輪東轉創自此矣穀水又南逕平樂觀東李尤平樂觀賦曰乃設平樂之顯觀章祕偉之奇珍華嶠漢書曰靈帝於平樂觀下起大壇上建十二重五采華蓋高十丈壇東北爲小壇復建九重華蓋高九丈列奇兵騎士數萬人天子住大蓋下禮畢天子躬櫬甲稱無上將軍行陣三匝而還設祕戲以示遠人故東京賦曰其西則有平樂都場示遠之觀龍雀蟠蛇天馬半漢應劭曰飛廉神禽能致風氣古人以良金鑄其象明帝

永平五年長安迎取飛廉并銅馬置上西門外平樂觀今於上西門外無他基觀惟西明門外獨有此臺巍然廣秀疑即平樂觀也又言皇女雅殤靈於臺側故復名之曰皇女臺晉灼曰飛廉鹿身頭如雀有角而地尾豹文董卓銷爲金用銅馬徙於建始殿東階下胡軍喪亂此象遂淪穀水又南逕西門門故廣陽門也門左枝渠東派入城逕木社前又東逕太廟南又東於清陽門右下注陽渠穀水又南東屈逕津陽門南故津陽門也昔洛水泛決漂落害者衆津城門校將築以遏水諫議大夫陳宜止之曰王尊正也水絕其足朝廷中興必不入矣水乃造門而退穀水又東逕宣陽門南故苑

門也皇都遷洛移置於此對閭闔門南直洛水浮
析故東京賦曰沂洛背河左伊右瀍者也夫洛陽
考之中土下惟洛食寔爲神也門左即洛陽池處
也池東舊平城門所在矣今塞北對南陽南宮故
蔡邕曰平城門正陽之門與宮連屬郊祀法駕所
由從出門之最尊者洛陽諸宮名曰南宮有謬臺
臨照臺東京賦曰其南則有謬門曲榭依阻城洫
注云謬門水室門也阻依洫城下池也皆屈曲耶
行依城池爲道故說文曰隍城池也有水曰池無
水曰隍矣謬門即宣陽門也門內有宣陽水室周
禮有冰人日在北陸而藏之西陸朝覲而出之冰
室舊在宣陽門內故得是名門旣擁塞冰室又罷
穀水又逕靈臺北望雲物也漢光武所築高六丈
方二十步世祖嘗宴於此臺得走鼠於臺上亦諫
議大夫第五子陵之所居倫少子也以清正洛陽
無主人鄉里無田宅寄止靈臺或十日不炊司隸
校尉南陽左雄尚書廬江朱孟興等故孝廉功曹
各致禮餉並辭不受永建中卒穀水又東逕平昌
門南故平門也又逕明堂北漢光武中元元年立
尋其墓構上圓下方九室重隅十二堂蔡邕月令
章句同之故引水於其下爲壁雍也穀水又東逕
開陽門南晉宮閣名曰故建陽門也漢官曰開陽
門始成未有名宿昔有一柱來在樓上琅琊開陽
縣上言南城門一柱飛去光武皇帝使來識視良

是遂堅傳之列記年月日以名焉湯仲弓嘗爲門
候上微行夜還湯閉門不內朝廷嘉之又東經國
子太學石經北周禮有國學教成均之法學記曰
古者家有塾黨有庠遂有序國有學亦有虞氏之
上庠下庠夏后氏之東序西序殷人之左學周人
之東膠虞庠王制云養國老於上庠養庶老於下
庠故有太學小學矣國之子弟焉謂之國子漢魏
以來置太學於國子堂東漢靈帝光和六年刻石
鏤碑載五經立於太學講堂前悉在東側蔡邕以
嘉平四年與五官中郎將堂谿典光祿大夫彈議
郎張訓韓說太史令單颺等奏求正定六經文字
靈帝許之邕乃自書丹於碑使工鐫刻立於太學

門外於是後儒晚學咸取正焉及碑始立其觀視
及筆寫者車乘日千餘兩填塞街陌矣今碑上悉
銘刻蔡邕等名魏正始中又立古篆隸三字石經
古文出於黃帝之世倉頡本鳥跡爲字取其孳乳
相生故文字有六義焉自秦用篆書焚燒先典古
文絕矣魯恭王得孔子宅書不知有古文謂之科
斗書蓋因科斗之名遂効其形耳言大篆出於周
宣之時史籀創著乎王東遷文字乖錯秦之李斯
及胡毋敬有改籀書謂之小篆故有大篆小篆焉
然許氏字說專釋於篆而不本古文言古隸之書
起於秦代而篆字文繁無會劇者故用隸人之省
謂之隸書或云即程邈於雲陽增損者是言隸者

篆捷也孫暢之嘗見青州刺史傳弘什說臨淄人發古塚得銅棺前和外隱爲隸字言齊太公世孫胡公之棺也唯三字是古隸同今書證知隸自出古非始於秦魏初傳古文出邯鄲淳石經古文轉失淳法樹之於堂西石長八尺廣四尺列石於其下碑石四十八枚廣三十丈魏文帝又刊典論六碑附子其次陸機言太學贊別一碑在講堂西下列石龜碑載蔡邕韓說高堂谿等名太學弟子贊復一碑在外門中今二碑並無石經東有一碑是漢順帝陽嘉八年立碑文云建武二十七年造太學年積毀壞永建六年九月詔書修太學刻石記年用作工徒十一萬二千人陽嘉九年八月作畢

碑南面刻頌表裏鏤字猶存不破漢石經北有晉辟雍行禮碑是太始二年立其碑中折但世代不同物不停故石經淪缺存半毀幾駕言永久諒用憮焉考古有三雍之文今靈臺太學並無辟雍處晉永嘉中王彌劉曜入洛焚毀二學尚髣髴前基矣穀水於城東南隅枝分北注逕清陽門東故清明門也亦曰稅門也亦曰芒門又北逕東陽門東故中東門也又北逕故太倉西洛陽地記曰大城東有太倉倉下運船常有千計即是處也又北入洛陽溝穀水又東左迤爲池又東右出爲方湖東西一百九十步南北七十步故水衡署之所在也穀水又東南轉屈而東注謂之阮曲云阮嗣宗之

故居也穀水又東注鴻池陂百官志曰鴻池池名也在洛陽東二十里承一人二百石池東西千步南北千一百步四周有塘池中又有東西橫塘水溜逕通故李尤鴻池陂銘曰鴻澤之陂聖王所規開又東注出自城池也其水又東左合七里澗晉後略曰成都王使吳人陸機爲前鋒都督代京師輕進爲治軍所處大敗於鹿苑人相登躡死於塹中及七里澗澗爲之滿卽是澗也澗有石梁卽旅人橋也昔孫登不欲久居洛陽知楊氏榮不保終思欲遁跡林鄉隱淪安死楊駿埋之於此橋之東駿後尋亡矣搜神記曰太康末京洛始爲折楊之歌有兵革辛苦之辭駿後被誅太后幽死折爲之

應也楊凡是數橋皆累石爲之亦高壯矣制作甚佳雖以時往損功而不廢行旅朱超石與兄書云橋去洛陽宮六七里悉用大石下負以通水可受大舫過也竒制作題其上云太康三年十一月初就功日用七萬五千人至四月末止此橋逕破落復更修補今無復文字陽渠水又東流逕漢廣野君灑食其廟南廟在北山上成公綏所謂偃師西山也山上舊基尚存廟宇東面門有兩石人對倚北石人胷前銘云門亭長石人西有二石闕雖經頽毀猶高丈餘闕西卽廟故基也基前有碑文字剥缺不復可識子安仰澄芬於萬古讚清微於廟像文字厥集矣陽渠又東逕毫殷南昔盤庚所遷

改商曰殷此始也班固曰尸鄉故殷湯所都者也
故亦曰湯亭薛瓚漢書注皇甫謐帝王世紀並以
爲非以爲帝嚳都矣晉太康地理記並言田橫死
於是亭故改曰尸鄉非也余按司馬彪郡國志以
爲春秋之尸氏也其澤野負原夾郭多墳壠焉即
陸士衡會王輔嗣處也袁氏王陸詩叙機初入洛
次河南之偃師時忽結陰望道左右民居者因往
退宿見一少年姿神端遠與機言玄機服其能而
無以酬折前至一辯文機題緯古今綜檢名實此
少年不甚欣解將曉去稅駕逆旅嫗曰君何宿而
來自東數十里無村落上有山陽主家墓機乃怪
悵還睇昨路空野昏霾雲攢蔽日知所過者審王
弼也此山卽祝雞翁之故居也搜神曰雞翁者洛
陽人也居尸鄉北山下養雞百年餘雞至千餘頭
皆有名字欲取呼之名則種別而至後之吳山莫
知所去矣穀水又東逕偃師城南皇甫謐曰帝嚳
作都於亳偃師是也王莽之所謂師氏者也穀水
又東流注于洛水矣

甘水出引農宜陽縣鹿蹄山

山在河南陸渾縣故城西北俗謂之縱山水之所
導發于山曲之中故世人目其所爲甘掌焉

東北至河南縣南北入洛

甘水發源東北流北屈逕一故城東在非山上世
謂之石城也京相璠曰或云甘水西山上夢汁而

平有故甘城在河南城西二十五里指謂是城也
余按甘水東一十許里洛城南有故甘城焉北對
河南故城世謂之鑿洛城鑿甘聲相近即故甘城
也爲王子帶之故邑矣是以昭叔有甘公之稱焉
甘水又與非山水會水出非山東谷東流入于甘
水甘水又於河南城西北入洛經言縣南非也故
京相璠曰今河南河南縣西有甘水北入洛斯得
之矣

漆水出扶風杜陽縣俞山東北入于渭

山海經曰踰次之山漆水出焉北流注于渭蓋自
北而南矣尚書禹貢太史公禹本紀云導渭水東
北至涇又東逕漆沮入于河孔安國曰漆沮一名

矣亦曰洛水也出馮翊北周太王去邠度渠踰梁
山上峽下故詩云民之初生自土沮漆又曰率西
水澣至於岐下是符禹貢本紀之說許慎說文稱
渠水出右扶風杜陵縣岐山東入謂從水渠聲又
云一曰漆城池也潘岳關中記曰關中有涇渭灃
澆鄠鄠漆沮之水鄠鄠漆沮四水在長安西有渠
縣皆注鄠鄠水北注渭開山圖曰麗山西北有溫
地溫地西南八十里岐川在杜陵埤長安西有渠
謂之渠渠班固地理志云渠水出渠縣西關駟十
三州志又云漆水出漆縣西北岐山東入渭今有
水出杜陽縣岐山北渠溪謂之渠渠西南流注岐
水但川土奇異今說平出考之經史各有所據識

淺見浮無以辯之矣

澹水出京兆藍田谷北入于灞

地理志曰澹水出南陵縣之藍田谷西北流與一水合水出西南莽谷東北流注澹水澹水又北歷藍田川北流注于灞水地理志曰澹水北至灞陵入灞水

沮水出北地直路縣東過馮翊殺裊縣北東入于洛地理志曰沮出畿縣西東入洛今水自直路縣東南逕焦石山東南流歷檀臺川俗謂之檀臺水屈而夾山西流又西南逕宜君川世又謂之宜君水又得黃欽水口水西北出雲陽縣石門山黃欽谷東南流注宜君水又東南流逕殺裊縣故城西縣

以漢景帝二年置其水南合銅官水水出東北而西南逕銅官川謂之銅官水又西南流逕殺裊縣東西南流逕其城南原下而西南注宜君水宜君水又南出土門山西又謂之沮水又東南歷土門南原下東逕懷德城南城在北原上又東逕漢太上皇陵北陵在南原上沮水東注鄭渠昔韓欲令秦無東伐使小工鄭國間秦鑿涇引水謂之鄭渠渠首上承涇水於中山西瓠口所謂瓠中也爾雅以爲周焦誤矣渠並北山東注洛三百餘里欲以溉田中作覺欲殺鄭國曰始臣爲間然渠成亦秦之利卒使就渠渠成而用注填闕之水溉澤鹵四萬餘畝皆畝一鍾關中沃野無復凶年秦以富強

卒并諸侯命曰鄭渠渠瀆東逕宜秋成北又東逕中山南河渠書曰鑿涇水自中山而封禪書漢武帝獲寶鼎於汾陰將薦之甘泉鼎至中山氤氳有黃雲蓋焉徐廣史記音義曰關中有中山非冀州者也指證此山俗謂之仲山非也鄭渠又東逕捨車宮南紀治谷水鄭渠故瀆又東逕嶺嶸山南池陽縣故城北又東絕清水又東逕北原下濁水注焉自濁水以上無濁水上承雲陽縣東大黑泉東南流謂之濁谷水又東南出原注鄭渠又東歷原逕曲梁城北又東逕太上陵南原下北屈逕原東與沮水合分爲工水一水東南出耶濁水也至白渠與澤泉合俗謂之柴水又謂之爲柴沮水絕白渠東逕萬年縣故城北爲櫟陽渠城即櫟陽宮也漢高帝葬皇考於是縣起墳陵署邑號改曰萬年也地理志曰馮翊萬年縣高帝置王莽曰黑赤也故徐廣史記音義曰櫟陽今萬年矣關駟曰縣西有涇渭北有小河渭此水也其水又南屈更名石川水又西南逕郭狼城西與白渠枝渠合又南入于渭水也其一水東出即沮水也東與澤泉合水出沮東澤中與沮水隔原相去十五里俗謂是水爲渠水也東流逕薄昭墓南塚在北原上又逕懷德城北東南注鄭渠合沮水又自沮直絕注濁水至白渠合焉故濁水得柴沮之名也沮循鄭渠東逕當道城南城在潁陽縣故城南潁陽宮也公置

城北有潁山山有漢武帝殿以石架之縣在山南故曰潁陽也應劭曰縣在潁水之陽今縣之左右無水以應之所可當者惟鄭渠與沮水又東逕蓮芍縣故城北十三州志曰縣以草受名也沮水又東逕漢光武故城北又東逕粟邑縣故城北莽更名粟城也後漢封騎都尉耿夔爲侯國其水又東北流注于洛水也

水經卷第十六

水經卷第十七

渭水上

漢桑欽撰

後魏酈道元注

渭水出隴西首陽縣渭谷亭南鳥鼠山

渭水出首陽縣首陽山渭首亭南谷山在鳥鼠山西北此縣有高城嶺嶺上有城號渭源城渭水出焉三川合注東北流逕首陽縣西與別源合水出南鳥鼠山渭水出谷尙書禹貢所謂渭出鳥鼠者也他說曰鳥鼠山同穴之枝幹也渭水出其中東北過過同穴枝間旣言其過明非一水也又東北流而會于殊源也渭水東南流逕首陽縣南右得封浞水次南得廣相溪水次東得共谷水左則天

馬溪水次南則伯陽谷水並參差翼注亂流東南出矣

又北過襄武縣北

廣陽水出西山二源合注成一川東北流注于渭渭水又東南逕襄武縣東北荆頭川水入焉水出襄武西南烏鼠山荆谷東北逕襄武縣故城北王莽更名相桓漢護羌校尉溫序行部爲隗躡部苟宇所拘銜鬢自刎處也其水東北流注于渭渭水常若東南不東北也又東臬水注之水出西南雀富谷東北逕襄武縣南東北流入于渭魏志稱咸熙二年襄武上言大人見身長三丈餘跡長三尺一寸白髮著黃單衣巾拄杖呼民王始語云今當

太平十二月天祿永終曆數在晉遂遷魏而事晉又東過獮道縣南

右則岑溪水次則司水俱左則過水右注之源水東南逕獮道故城西昔秦孝公西斬戎之獮王應劭曰獮戎邑也漢靈帝五年別爲南安郡赤亭水出東山赤谷西流逕城北南入渭水渭水又逕城南南得粟水水出西南安都谷東北流注于渭渭水又東新興川水出西南烏鼠山二源合舍東北流與彰川合水出西南溪下東北至彰縣南水屬道故侯尉治後漢縣之永元元年帝封耿秉爲侯國也萬年川水出南山東北流注之又東北注新興川又東北逕新興縣北晉書地道記南安之屬縣

也其水又東北與南川水合出西南山下東北合
北水又東北注于渭水渭水又東逕城武縣西武
城川水入焉津源所道出鹿部西山兩源合注東
北流逕鹿都南亦謂之鹿部水又東北昌丘水出
西南丘下東北注武城水亂流東北注渭水渭水
又東入武陽川又有關城川水出南安城谷水出
比丘川參差注渭水渭水又東與落門西山東流
三府谷水注之三川統一東北流注于渭水有落
門聚昔馮異攻落門未拔而薨建武十年來歙又
攻之擒隗囂子純隴右平渭水自落門東至黑水
峽左右六水夾注左則武陽溪水東門得土門谷
水俱出北山南流入渭左則有溫谷次東有故城
溪水次東有閭里溪水亦名習溪水次東有黑水
並出南山北流入渭水又東出黑水歷冀川
又東過冀縣北

渭水自黑水峽至崆峒南北一十水注之北則溫
谷水注之其水道平襄縣南山溫溪東北流逕平
襄縣南城故襄戎邑也王莽之謂平襄縣矣其水
東南流歷三堆南又東流而南屈入黃槐川梗津
渠冬則輟流春夏承盛則通川注渭次則午谷水
南入渭水南有長塹谷水次東有安蒲溪水次東
有衣谷水並南出朱圉山山在梧中聚有石鼓不
擊自鳴鳴則兵起漢成帝鴻嘉三年天水冀南山
有大石自鳴聲隱隱如雷有頃止聞于平襄二百

四十里野雞皆鳴石長丈三尺廣厚略等在崕脇
去地百餘丈民俗名曰石鼓石鼓鳴則有兵是歲
廣漢黜子攻死囚盜庫兵略吏民衣繡衣自號爲
仙君黨與漫廣明年冬伏誅自歸者三千餘人信
而有徵其水北逕冀縣城北秦武公十年代冀戎
縣之故天水郡治王莽更名鎮戎縣曰冀治漢明
帝永平十七年改曰漢陽郡城即隗囂稱西伯所
居也後馬超之圍冀也涼州別駕閻伯儉潛出水
中將告急夏侯淵爲超所擒令告城無救伯儉曰
大軍方至咸稱萬歲超怒數之伯儉曰卿欲令長
者出不義之言乎遂殺之渭水又東合冀水水出
冀谷次東濁谷水次東有當里溪水次東有託里
水次東有渠谷水次東有黃土川水俱出南山北
逕城冀東而北流于渭渭水又東出岑峽入新陽
川逕新陽下城南溪谷赤蒿二水並出南山東北
入渭水渭水又東與新陽崕水合即隴水也東北
出隴山其水西流隴右逕瓦亭南隗囂聞略陽陷
使牛邯守瓦亭即此亭也其水亦出隴山東南流
歷瓦亭北又西南合爲一水謂之瓦亭川西南流
逕清賓溪北又西南與黑水合水出黑城北西南
逕黑城西西南流莫吾南川水注之水東北出隴
垂西南流歷黑城南注黑水黑水西南出懸鏡峽
入西南入瓦亭川又有澁水自西東會世謂之鹿
角口又南逕阿陽縣故城東中平元年北地氐胡

與邊章侵隴右漢陽長吏蓋勳屯阿陽以拒賊即此城也其水又南與燕無水合水源延發東山西注瓦亭水瓦亭水又南左會方城川西注瓦亭水右與成紀水合源導西北當亭川東流出破石峽津流遂斷故瀆東逕成紀縣故帝太皞庖犧所生之處也漢氏以爲天水縣王莽之阿楊郡治也又東潛源隱發通之成紀水東南入瓦亭川川水又東南與受渠水相會水東出大隴山西逕受渠亭北又西南入瓦亭川川水又西南流歷僵人峽路側巖上有死人僵尸巒穴故岫壑取名焉釋鞍就穴直上可百餘仞石路逶迤劣通單步僵尸倚窟

枯骨尚全唯無膚髮而已訪其川居之士云其卿中父老作童兒時已聞其長舊傳此當是數百年骸矣其水又西南與略陽川水合水出隴山香谷西西流右則單溪西往左則閣水入焉其水又西歷蒲池郊石魯水出東南石魯溪西北注之其水又西入略陽川西得破社谷水次西得平相谷水又西得金里谷水又西得南室水又西得蹄谷水並出南山北流於略陽城東楊波北注川水又西逕略陽道故城北渥渠水出南山北逕渥峽北入城建武八年中郎將來歙與蔡遵所部護軍王忠右輔將軍朱寵將二千人皆持鹵刀斧自安民縣之楊城永始二年成帝罷安定呼他苑以爲安民

縣起官寺市里從審傾回中伐樹木開山道至略陽夜襲擊黽拒守將軍金梁城等皆殺之因保其城隗黽聞略陽陷悉衆以攻歙激水灌城光武親將躡走西城世祖與來歙會于此其水自城北注川一水二川蓋黽所竭以灌略陽也川水西得白陽泉又西得蒲谷水西得蒲谷西川又西得龍尾溪水與渭谷水合俱出南山飛清北入川水水又西南得水洛口水源東導隴山西逕水洛高西南流又得犢奴水口水出隴山西逕犢奴川又西逕水洛亭南西北注之亂流西南逕石門峽謂之石門水西南注洛陽川略陽川水又西北流入瓦亭水瓦亭水又西南出顯親峽石岩水注之水出北

山山上有女媧祠庖羲之後有帝女媧焉與神農爲三皇矣其水南流注瓦亭水瓦亭水又西南逕顯親縣故城東南漢封大鴻臚竇固爲侯國自石宕次得蝦蟇溪水得金黑水又得宜都溪水咸出左右參差相入瓦亭水又東南合安夷川口水源東出更胡谷西北流歷夷水川與東陽川水會謂之取陽交又西得何宕川水又西得羅漢水並自東北西南注夷水夷水又西逕顯親縣南西注瓦亭水瓦亭水又東南得大華谷水又東南得折里溪水又東得六合水皆出近溪湍峽注瓦亭水又東南出新陽峽岨岫壁立水出其間謂之新陽岨水又東南流于渭是也

又東過上邽縣

渭水東歷縣北封山流之陰逕固嶺北東東南流
蘭渠川水出自北山帶佩衆溪南流注于渭渭水
東南與神澗水合開山圖所謂靈泉池也俗名之
爲石萬灣淵深不測實爲靈異先後慢遊者多離
其斃渭水又東南得歷泉水北歷泉溪東南流注
于渭渭水又東南出橋西亭西又南得藉水口水
出西山百澗聲流摠成一川東歷當亭川即當亭
縣治也左則當亭水注之右則曾席水又東與大
弁州水出西山二源合注東歷大弁川東南又注
于藉水藉水又東南流與竹嶺水合水出南山竹
嶺二源同瀉東北入藉水藉水又次東北入上邽

縣左佩五水東會占溪水次東有大魯溪水次東
得小魯谷水次東有楊反谷水咸自北山注離注
藉水藉水右帶五水竹嶺東得亂石溪水次東得
水門谷水次東得羅城溪水次東得山谷水皆導
源南山北流入藉水藉水又東黃瓜水注之其水
發源黃瓜西谷東流逕黃瓜縣北又東清溪白水
左右夾注又東北大旱谷水南出旱溪歷澗北流
泉溪委漾同注黃瓜水黃瓜水又東北歷赤谷咸
歸于藉藉水又東毛泉谷水又東逕上邽城南又
得覈泉水並出南山北流注于藉藉水即淠水也
北有濛水注焉水出縣西北邽山翼帶衆流積以
成溪東溪南屈逕上邽縣故城西側城南出上邽

故邽戎國也秦武公十年伐邽縣之舊天水郡治五城相接北城中有湖水有白龍出是湖風雨隨之故漢武帝元鼎三年改爲天水郡其鄉居悉以板蓋屋詩所謂西戎板屋也濠水又南注藉水山海經曰邽山濠水出焉而肅流注于洋謂是水也藉水又東得其陽谷水又得宕水谷水並自南山北入于藉藉水又東合段溪水出西南馬門溪東北流合藉水藉水又東入于渭渭水又歷橋亭南而入綿諸縣東與東亭水合亦謂之爲橋水也清水又或爲通稱矣水源東發小隴山衆川瀉浪統成一水西入東亭川爲東亭水與小祗大祗二水合又西北得南神谷水三川並出東南差池瀉注

又有埋蒲水翼帶二川與延水並西南注東亭水東亭水又西右則嘆溝水次西得翅谷水水側出東南二溪西北流注東亭川東亭川水右則温谷水出小隴山又西蒞谷水出南北蒞溪西南注東亭川水東亭川水又西得清水口清水導源東北隴山一源俱發西南出龍口合成一水西南流磨細野峽逕清池谷又逕清水縣故城東王莽之識睦縣矣其水西南合東亭川謂之清水又逕清水城南又西與秦水合水出東北大隴山秦谷二源雙導歷三泉合成一水而歷秦川川有育故亭秦仲所封也秦之爲號始自是矣秦水西逕降隴縣故城南又西南自亥松多二水出隴山合而西南

流逕降隴城北又西南注秦水秦水又西南歷隴川逕六槃口過清水城西南注清清上下咸謂之秦川又西羗水注焉水北出羗谷引納衆流合以成溪澁水星會謂之小羗水西南流左長谷水西南注之右則東部水東南入焉羗又南入清水清水又西南得綿諸水口其道源西北諸溪東南與長思水北出思溪南入綿諸水又東南歷綿諸故道北東南入清水清水東南注渭渭水又東南注谷水水出西南注谷之山東北流與橫水合水出東南橫谷西北逕橫水壙入西北注谷水亂流西北出注谷峽又西北軒轅谷水注之水出南山軒轅溪南安姚瞻以爲黃帝生於天水在上郢城東

七十里軒轅谷皇甫謐云生壽丘丘在魯東門北未知孰是也其水北流注涇涇谷水又西北白城谷溪東北流白娥泉水出其西東注白城水白城水又東北入注谷水谷水又東北歷董亭下陽難當使兄子保宗鎮董亭即是亭也其水東北流注于渭山海經曰注谷之山注水出焉東南流注于渭是也謂水又東伯陽谷水入焉水出刑馬之山伯陽谷北流白水出東南白溪水西北注伯陽水伯陽水又西北歷谷引控羣流北注渭水又東歷大利又東南流猫谷水注之水出南刑馬山北歷平作西北逕苗谷屈而東逕伯陽城南謂之伯陽川蓋李耳西入往逕所由故山原畎谷往往播其

名焉渭水東南流衆川瀉浪邊次鳴注左則伯陽
東溪水注之次東得望松水次東得毛六溪水次
東得皮周谷水次東得黃杜東溪水出北山南入
渭水其右則胡谷水次東丘谷水次東得丘谷東
溪水次東有銅岩谷水並出南山東北注渭渭水
又東南出石門度小隴山逕南田縣南東與楚水
合世所謂長蛇水水出刑縣之數歷山也南流逕
長蛇戍東魏和平三年築徙諸流民以過隴冠楚
水又南流注于渭鬪駟以是水爲沂水言又東沂
汧二水入焉余按渭地志沂水出沂縣西北鬪駟
十三州志曰與此同復以沂水爲龍魚水蓋以其
津流逕通而更攝其通稱泉矣水束入散關抱朴

子神仙傳曰老子西出關關令尹喜候氣知真人
將有西遊者遇老子疆令之著書耳不得已爲著
道德二經謂之老子書也有老子廟于寶搜神記
云老子將西入關關令尹喜好道之士覩真人當
西乃要之途也皇甫士安高士傳云老子爲周柱
下史及周衰乃以官隱爲周守藏室史積八十餘
年好無名接而世莫知其真人也至周景王十年
孔子年十七遂適周見老聃然幽王失其道平王
東遷關以捍移人以職徙尹喜候氣非此明矣而
往逕所由茲焉或可是渭水又東逕西武功北俗
以散關城非也褚先生乃曰武功扶風西界小邑
也蜀口棧道近山無他豪易高者是也渭水又與

其扞水合水周道谷北逕武都道縣之故城西王莽更名曰善治也道縣有怒特祠列異傳曰武都故道縣有怒特祠云神本南山大梓也昔秦文公二十七年伐之對瘡隨合秦文公乃遣四十人持斧斫之猶不斷疲士一人傷足不能去臥對下聞鬼相與言曰勞攻戰乎其一日足爲勞矣又曰秦公必特不休荅曰其如我何又曰赤灰跋於子何如乃默無言臥者以告令士皆赤衣隨所斫以灰跋對斷化爲牛入水故秦爲立祠其水又東北歷大散關而入渭水也渭水又東而又合南山五溪水諸澗流注之也

又東過陳倉縣西

縣有陳倉山山上有寶雞鳴祠昔秦文公咸伯之言遊獵於陳倉遇之於此坂得若石焉其色如肝城如寶祠之故曰陳寶其來也自東南暉暉聲若雷野雞皆鳴故曰雞鳴神也地理志曰有上公明黃帝孫舜妻冢有羽隱宮秦武王起應劭曰縣氏陳山姚睦曰黃帝都陳言在此營氏開山圖注曰伏犧生成起起徙治陳倉也非陳國所建也魏明帝遣將軍太原郝昭榮陳倉城成諸葛亮圍之亮使昭鄉人靳詳說之不下亮以數萬攻昭十餘人以雲梯衝車地道逼射昭昭以火射連石拒之亮不利而還今灑水對亮城是與昭相禦處也陳倉水出于陳倉山下東南流注于渭水渭水又東與

陽溪合其水上承斜水水自斜谷分往綏陽溪北
屆陳倉入渭故諸葛亮與兄瑾書曰有綏陽小谷
雖山岨絕重溪水縱橫難用行軍者邏候往來要
道通人今使前軍斫治此道以向陳倉足以扳連
賊勢使不得分兵東行者也渭水又東逕郁夷縣
故城南地理志曰有汧水祠王莽更之曰郁平也
東觀漢書曰隗囂圍來歙於略陽世祖詔曰桃花
水出船檠皆至郁夷陳倉分部而進者也汧水入
焉水出汧縣之蒲谷鄉維中谷決爲絃蒲藪爾雅
曰水決之澤爲汧汧之爲名寔兼斯舉水有二源
一水出縣西山世謂之小龍山巖嶂高嶮不通軌
轍故張衡四愁詩曰我所思兮在漢陽欲往從之

隴坂長其水東北流歷澗注以成淵潭漲不測出
五色魚俗以爲靈而莫敢操捕因謂是水爲龍魚
水自下亦通謂之龍魚川川水東逕汧縣故城北
史記秦文公東獵汧田因遂都其地是也又東歷
澤亂爲一右曰龍泉泉逕五尺源流舊通淪漪四
泄東北流注于汧汧水又東會一水發南山西側
俗以此山爲吳山三峰霞舉霄秀雲天崩岵傾返
山頂相捍望之恒有落勢地理志曰吳山在縣西
古之汧山也國語所謂虞矣山下石穴廣四尺高
七尺水溢石空懸波側注瀟瀟盪發源穴川北流
注于汧自水會上下咸謂之龍魚川汧水又東南
以逕隄麋縣故城南王莽之扶亭也昔郭欵耻王

莽之微而遁跡於斯建武四年光武封耿沉爲侯
國矣汧水東南歷慈山東南逕郁夷縣逕平陽故
城南史記秦寧公二年徙平陽徐廣曰故郁之平
陽亭也城北有漢邠州刺史趙融碑靈帝建安元
年丘汧水又東流于渭水渭水之右磻溪水注之
水出南山茲谷乘高激流注于溪中溪中有泉謂
之茲泉泉水潭積自成淵渚即呂氏春秋所謂太
公釣茲泉也今人謂之几谷石壁深高幽隍邃密
林障秀阻人跡罕交東南隅有石室蓋太公所居
也水流次平石釣處即太公垂釣之所也其投竿
踞餌兩膝遺跡猶存是有磻溪之稱也其水清冷
神異北流十二里注于渭北去維堆城七十里渭
水又東逕石源即北原也青龍二年諸葛亮出斜
谷與司馬懿屯渭南雍州郭淮策亮必爭北原而
北遂先據之亮至渭水又逕五丈原北魏春秋曰
諸葛亮據渭水南原司馬懿謂將諸曰亮若出武
功依山東轉者是其勇也若西上五丈原諸君無
事矣亮果屯此原與懿相禦渭水又東逕郿縣故
城南地理志曰右輔都尉治魏春秋諸葛亮寇郿
司馬懿據郿拒亮即此縣也

水經卷第十八

渭水中

漢桑欽撰

後魏酈道元注

又東逕武功縣北

渭水於縣斜水自南注之水出縣西南衙嶺山北歷斜谷逕五丈原東諸葛亮與步騭書曰僕前軍在五丈原原在武功西十里餘水出武功縣故亦謂之武功水也是以諸葛亮表云臣遣虎步監孟琰據武功水東司馬懿因水長攻琰營臣作竹橋越水射之橋成馳去其水北流注于渭地理志曰斜水出衙嶺北至郿注渭水又東逕馬冢北諸葛亮與步騭書曰馬冢在武功東十餘里有高勢攻

之不便是以留耳渭水又逕武功縣故城北王莽
之新光也地理志曰縣有太一山古文以爲終南
杜預以爲中南也亦曰太白山在武功縣南去長
安二百里不知其高幾何俗云武功太白去天三
百山下軍行不得鼓角鼓角則疾風雨至杜彥達
曰太白山南連武功山於諸山最爲秀傑冬夏積
雪望之皓然山上有谷春祠春櫟陽人成帝時病
死而尸不寒後忽出櫟南門及光門上而入太白
山民爲立祠於山嶺春秋來祠中山宿焉山下有
太白祠民所祀也劉曜之世是山崩長安人劉終
於崩忘也惠公孝公並是穆公之後繼世之君矣
子孫無由起宮於祖宗之墳陵矣以是推之知二
證之非實也而左會左陽水世名之西水北出左
陽溪南流逕岐州城西魏置岐州刺史治左陽水
又南流注于雍水雍水又與東水合俗名也北出
河桃谷南流右會南源世謂之返眼泉亂流南逕
岐州城東而南合雍水州居二水之中南則兩川
之交會也世亦名之爲涿空水東流鄧公泉注之
水出鄧艾祠北故名曰鄧公泉數源俱發於雍縣
城南縣故秦德公所居也晉書地道記以爲西虢
地也漢書地理志以爲西虢縣太康記曰虢叔之
國矣有虢宮平王東遷叔自此之上陽爲南虢矣
雍有五時祠以上祠祀五帝昔秦文公田于沂渭
之間夢黃蛇自天屬地其口止於廊行以爲上帝

之神於是作鄜時祠白帝秦宣公作密時於陳倉
北坂祀青帝焉靈公又於吳陽作上時祀炎帝焉
獻公作畦時祠赤帝焉漢高帝問曰天有五帝今
何四也博士莫知其故帝曰我知之矣待我而五
遂立北時祀黑帝焉應劭曰四面積高曰雍闕駟
曰宜爲神明之隩故丘羣祠焉又有鳳臺鳳女祠
秦穆公時有簫史者善吹簫能致白鵠孔雀穆公
女弄玉好之公爲作鳳臺以居之積數十年一旦
隨鳳去云雍宮世有簫管之聲焉今臺傾祠毀不
復然矣鄧泉東流注于雍自下雖會他津猶得通
稱故禹貢有雍沮會同之文矣雍水又東逕郿亭
南世謂之樹亭川蓋郿樹聲相近悞耳亭被郿公
之菜邑也京相璠曰城在周城南五十里後漢郡
國志曰郡縣有郿亭謂此也雍水又東南流與杜
水合水出杜陽山其水南流謂之杜陽川東南流
左會漆水水出杜陽之縣漆溪謂之漆渠故徐廣
曰漆水出杜陽之岐山者是也漆水渠水南流大
藥水注之出西北大道川東南流入漆卽故岐水
也淮南子曰岐水出石橋山東南流相如封禪書
曰牧龜於岐漢書音義曰岐水名也謂斯水矣二
川洋逝俱爲一水南與杜水合俗謂之小黃水亦
或名之米流川逕岐山而又屈逕因城南城在岐
山之陽而近西所謂居岐之陽也非直因山致名
亦指水取稱矣又曆周原下北則中水鄉成周聚

故曰有周也水北卽岐山矣昔秦盜食穆公馬處也岐水又東逕姜氏城南爲姜水按世本炎帝姜姓帝王世記曰炎帝神農氏姜母安登遊華陽感神而生炎帝長於姜水水合而東逕美陽縣之中亭川水也水發杜陽縣大嶺側世謂之赤泥峴泔波歷澗俗名大橫水也疑卽杜水矣其水東南流東逕杜陽故城東西三百步南北二百步世謂之故縣川又故谷縣有杜陽山山北有杜陽谷有地穴北入亦不知所極在大柱山南故縣取名焉亦指足水而攝目矣卽王莽之通杜者故地理志曰縣自杜水東二坑水注之水有二原一水出西北瀆魁水二合而東歷五將山又合鄉谷水水出鄉

溪東南流入杜謂之鄉谷川又南茨水注之水出好時縣梁山大嶺泉南逕梁山宮西故地理志曰好時有梁山宮秦始皇起水東有好時縣故城王莽之好邑也世祖建武二年封建威大將軍耿弇爲侯國又南逕美陽縣之中亭川注雍水謂之中亭水又南於美陽縣西永元二年更封鄣雍侯耿秉爲侯國其水又南流注于渭渭水又東逕郿塢南漢獻帝傳曰董卓發卒築郿塢高與長安城等積穀爲三十年儲自云事成雄據天下不成守此足以畢老其愚如此渭水之東洛谷之水出其南山洛谷北流逕長城西魏甘露三年蜀遣姜維出洛谷圍長城卽斯地也

又東芒水從南來流注之
水經卷第十八



水經卷第十九

渭水下

漢桑欽撰

後魏酈道元注



渭水又東過槐里縣南又東滂水從南來注之

渭水逕縣之故城南漢書集注李奇謂之小槐里
之西城也又東與芒水枝流合水受芒水於竹圃
東北流又屈而入于渭

渭水又東北逕黃山宮南

即地理志所云縣有黃山宮惠帝三年起者也東
方朔傳曰武帝微行西至黃山宮故世謂之遊城
非也

就水注之

水出南山就谷北逕大陵西世謂之老子陵昔李耳爲周柱史以世衰入戎於此有家事非經證然莊周著書云老聃死秦失吊之三號而出是非不死之言人稟五行之精氣陰陽有終變亦無不化之理以是推之或復如傳古人許以傳疑故兩存耳就水歷圃北與黑水合上承三泉就水之右三泉之奇發言婦一瀆北流左逕就水就水又北流注于渭

渭水又東合田溪水

水出南山田谷北流長楊宮西又北逕盩屋縣故城西又東北與一水合水上承盩屋南南泉北逕其縣東又北逕思鄉城西又北注田溪田溪水又北注流于渭水也縣苑有蒙龍源上承渭水於鄠縣東逕武功縣爲成林源東逕縣苑亦曰靈軹源河渠以引堵水徐廣曰一作諸水是也

渭水又東逕槐里縣故地南

縣古太丘邑也周赧王都之秦以爲廢丘亦曰舒丘和平元年桓帝封左中郎將皇甫嵩爲侯國縣南對渭水北背通渠史記秦本紀去秦武王三年渭水赤三日秦昭三十四年渭水又大赤三日洪範五行傳曰赤者火色也水盡赤以火沴水也渭水秦大川也陰陽亂秦用嚴刑敗亂之象後項羽入秦封司馬欣爲塞王都櫟陽董翳爲翟王都高奴章邯爲雍王都廢丘居槐里爲三秦漢祖北定

三秦引水濯城遂滅章邯三年改曰槐里王莽更名槐治也世謂之爲大槐里晉大康中始平郡治也其城迤帶防陸舊渠尚存即漢書所謂槐里環隄者也東有涌水出南山赤谷東北流逕長楊宮東宮有長楊樹因以爲名渭水又北逕葦園西亦謂之仙澤又北逕望仙宮又東北耿谷水注之水發南山耿谷北流與柳泉合東北逕五柞相去八里並以樹名宮亦由陶氏以五柳立稱故張晏曰宮有五柞樹在盩厔縣西其水北逕仙澤東北又逕望仙宮東又北與赤水會又北逕思鄉城東又北注渭水

渭水又東合甘水

水出南山甘谷北逕秦文王負陽宮西又北逕五柞宮東又北逕甘亭西在水東鄠縣昔夏啓伐有扈作誓於是亭故馬融曰有扈甘南郊地名也甘水又東得澇水口水出南山澇谷北逕漢宜春觀又東北逕鄠縣故城西澇水際城北出合美陂水水出宜春觀北東北流注澇水北流入于渭即上林故地也東方朔稱武帝建元中微行北至池陽西至黃山南獵長楊東遊宜春夜漏十刻乃出於外中常侍武騎待詔及隴西北地良家子能騎射者期諸殿下故有期門之號旦明入山下馳射鹿豕狐兔手格熊羆上大驪樂之上仍使太中大夫虞丘壽王與待詔能用竿者舉措阿城以南盩厔

以東宜春以西提封頃畝及其賈宜屬之南山以爲上林苑東方朔諫秦起阿房而天下亂因陳泰階六符之事上乃拜太中大夫給事中賜黃金百斤卒起上林苑故相如請爲天子遊獵之賦稱烏有先生亡是公而奏上林也

又東豐水從南來注之

他說云渭水又東與豐水會于短陰山內水會無他高山異巒所有唯原阜石激而已水上舊有便門橋與便門對直武帝建武三年造張昌曰橋在長安西北茂陵東如淳曰去長安四十里渭水又逕太公廟北前有太公碑文字褫缺今無可尋渭水又東北與鎬水合

水上承鎬池於昆明池北周武王之所都也故詩云考卜維王宅是鎬京維龜正之武王成之自漢帝穿昆明池於是地基構淪褫今無可究春秋後傳曰使者鄭客入伯谷關至平舒置見華山有素車白馬問鄭客安之荅曰之咸陽過鎬池曰吾華山君使願託書致鄙池君子之咸陽過鄙池見大梓下有文石取以欸扣梓當有應者以書與之勿妄發致之得所欲鄭客行至鄙池見一梓下果有文石取以欸梓應曰諾鄭客如睡覺而見宮闕若王者之居焉謁者出受書入又見頃聞語聲言祖龍死神道芒昧理難辯測故無以精其幽致矣鄙水又北流西北注與瀉池合水出鄙池西而北流

入于鄘毛詩云漉流浪也而世傳以爲水名矣鄭
玄曰豐鎬之間水北流也鎬水北逕溪靈臺西又
逕磁石門西門在阿房前悉以磁石爲故專其目
合四夷朝者有隱甲懷刃入門而脅之以示神故
亦曰却胡門也鎬水又北逕于渭渭水北有杜郵
亭咸陽十七里今名孝里亭中有白起祠嗟乎有
制勝之功慙尹商之仁是地即其伏劍處也

渭水又東北逕渭城南

文穎以爲故咸陽矣秦孝公之所居離宮也獻公
都櫟陽天雨金周太史儋見獻公曰周故與秦國
合而別別五百歲復合合七十歲而霸王出至孝
公作咸陽築冀闕而徙都之故西京賦曰秦里其
霸寔爲咸陽太史公曰長安故咸陽也漢高帝更
名新城武帝元鼎三年別爲渭城在長安西北渭
水之陽王莽之京城也始隸扶風後并長安
而沈水注之

其水上承皇子陂於樊川其地即杜之樊鄉也漢
祖至櫟陽以將軍樊噲灌廢丘最賜邑於此鄉也
其水西北流注杜縣之杜京西西北流逕杜伯塚
南杜伯與其友左儒杜宣王儒無罪見害杜伯死
之終能報恨於宣王故成公子安五言詩曰誰謂
鬼無知杜伯射宣王沈水又西北逕下杜城即杜
伯國也沈水又西北支合故渠渠有二流上承交
水合於高陽原而北逕河池陂東而北注沈水沈

水又北與昆明故池會又北逕秦通六基東又北逕塌水陂東又北得陂承其陂東北流入于沈水沈水又北逕長安城西與昆明池水合水上承池於昆明臺故王仲都所居也桓譚新論稱元帝被病廣求方士漢中送道士王仲都詔問所能對曰能忍寒暑乃以昆明池上環水而馳御者厚衣狐裘寒戰而仲都獨無變色臥於池臺上暉然自若夏大暑日使曝坐環以十爐火不言熱又身不汗池水北逕鎬京東秦阿房宮西史記曰秦始皇三十五年以咸陽之人多先王之宮小乃作朝宮於渭南亦曰阿城也始皇先作前殿阿房可坐萬人下可建五丈旗周爲閣道自殿直抵城南山表山顛爲闕爲複道自阿房度渭屬之咸陽象天極閣道漢抵營室也關中記曰阿房殿在長安西南二十里殿東西千步南北三百步庭中受十萬人其水又屈而逕其北東北流注塌水陂陂水北出逕漢武帝建章宮東於鳳闕南東注沈水又北逕鳳闕東三輔黃圖曰建章宮漢武帝造周二十餘里千門萬戶其東鳳闕高七丈五尺俗言真女樓非也漢武帝故事云闕高二十丈關中記曰建章宮圓闕臨北道有金鳳在闕上高丈餘故號鳳闕也繁欽建章鳳樓闕賦曰秦漢規模廓然毀泯唯建章鳳闕巋然獨存雖非象魏之制亦一代之巨觀也沈水又北分爲二水一水東北流一水北逕神

明臺東傳子宮室曰上於建章中作神明臺井幹樓咸高五十餘丈皆作懸閣輦道相屬焉三輔黃圖曰神明臺在建章宮中上有九室今人謂之九子臺而實非也沈水又逕漸臺東漢武故事曰建章宮北有太液池池中有漸臺三十丈漸浸也爲池水所漸一說星名也南有璧門三層高三十餘丈中殿十二間階陛咸以玉爲之鑄銅鳳五丈飾以黃金棲屋上掾首薄以玉璧因曰璧玉門也沈水又北流注渭亦謂是水爲滴水也故呂忱曰滴水出杜陵縣漢書音義曰滴水聲而非水也亦曰高都水前漢之末五侯王氏大治池沼引它水入長安城故百姓歌之曰五侯初起曲陽最怒壞決

高都竟連五杜上山漸臺像西白虎即是水也

又東過長安縣北

渭水東分爲二水廣雅曰水自渭出爲潁其由河之有雍也此瀆東北流逕魏雍州刺史郭淮南碑又東南合一水逕兩石人北秦始皇造橋鐵鑿重不勝故刻石作力士孟賁等像以祭之鑿乃可移動也又東逕陽侯祠北漲輒祠之此神能爲大波故配食河伯也後人以爲鄧艾祠悲哉讒勝道消專忠受害矣渭水又東注此水水上有梁謂之渭橋秦制也亦曰便門橋秦始皇作離宮於渭水南北以象天宮故三輔黃圖曰渭水貫都以象天漢橫橋南度以法牽牛橋廣六丈南北二百八十步

六十八間七百五十柱北馮翊立之有一百二十
二梁橋之南北有隄激立石柱柱南京北立之柱
北馮翊立之有令丞各領徒一千五百人橋之北
首壘石水中故謂之石柱橋也舊有村留神象此
神嘗與魯班語班令其人出村留曰我貌狼醜卿
善圖物容我不能出班於是拱手與言曰出頭見
我村留乃出首班於是以脚畫地村留覺之便還
沒水故置其象於水唯背以上立水上後董卓入
關遂焚此橋魏武帝遂更修之橋三丈六尺村留
之像曹公乘馬見之驚又命下之燕丹子曰燕太
子丹質於秦秦王遇之無禮乃求歸秦王爲機發
之橋欲以陷丹丹過之橋不爲發又一說交龍捧

輦而機不發但言今不知其故處矣

渭水又東與沈水枝津合

水上承沈水東北流逕鄧艾祠南又東分爲二水
一水東入逍遙園注藕池池中有臺觀蓮荷被浦
秀實可翫其一水北流于渭

渭水又逕長安城北

漢惠帝元年築六年成即咸陽也秦離宮無城故
城之王莽更名常安十二門東出北頭第一門本
名宣平門王莽更名春王門正月亭亦曰東城門
其郭門亦曰東都門即逢萌挂冠處也第二門本
名清明門一曰凱門王莽更曰宣德門布恩亭內
有藉田倉亦曰藉田門第三門本名霸城門王莽

更名仁壽門無疆亭民見門色青又名青城門或曰青綺門亦曰青門門外舊出佳瓜昔廣陵人邵平爲秦東陵侯秦破爲布衣種瓜此門瓜美故世謂之東陵瓜是以阮籍詠懷詩曰昔聞東陵瓜近在青門外連畛拒阡陌子母相鈎帶指謂此門也南出東頭第一門本名覆盎門王莽更名永清門長茂亭其南有下杜城應劭曰故杜陵之下聚落也故曰下杜門又曰端門北對長樂宮第二門本名安門亦曰鼎路門王莽更名光禮門顯樂亭即西安亭北對未央宮本名平門王莽更名信平門城正亭西出南頭第一門本名章門王莽之名萬秋門億年亭亦曰光畢門也又曰便門第二本名直門王莽更名直道門端路亭故龍樓門也張晏曰門樓有銅龍三輔黃圖曰長安西出第二門即此門也第三門本名西城門亦曰雍門王莽更名章義門著誼亭其水北入有函里氏名曰函里門又曰光門亦曰突門北出西頭第一門本名橫門王莽更名霸都門左幽亭如淳曰音光故曰光門其外郭有都門有棘門徐廣曰棘門在渭北孟康曰在長安北秦時宮門也如淳曰三輔黃圖曰棘門在橫門外按漢書徐厲軍於此備匈奴又有通門亥門也其第二門本名洛門又曰朝門王莽更名建子門廣世亭一曰高門蘇林曰高門長安城北門也又逕觀愚之山北流入于渭渭水又東西石

橋水南出馬嶺山積石據其東麗山距其西源西
上通懸流數十與華岳同體其水北逕鄭城西承
上有橋橋雖崩褫舊跡猶存東去鄭城十里故世
以橋名水也而北流注于渭闕駟謂之新鄭水渭
水又東逕鄭縣故城北史記秦武公十年縣之栢
公友之故邑也漢書薛瓚注言周自穆公已下都
於西鄭不得以封栢公也幽王既敗虢儉又滅遷
居其地國于鄭父之丘是爲鄭栢公無封京兆之
文余按遷史記考春秋國語世本言周宣王二十
二年封庶弟友於鄭又春秋國語並言栢公爲周
司徒以王室將亂謀於史伯而寄孥與賄於虢儉
之間幽王宮於戲鄭栢公死之平遷鄭武公輔王

室滅虢儉而兼其土故周栢公言於王曰我周之
東遷晉鄭是依及迂封於彼左傳隱公十一年鄭
伯公孫獲曰吾先君新邑於此其能與許爭乎是
其指新鄭爲言矣然班固應劭鄭玄皇甫謐裴顧
王隱闕駟及諸述作者咸以西鄭爲友之始封也
賢於薛瓚之單說也無宜違正經而從逸錄矣赤
眉樊崇於鄭北設壇祀城陽景王而尊右校卒史
劉俠卿牧牛兒盆子爲帝年十五被髮徒跣爲具
絳單衣半頭赤幘直綦履顧見衆人拜恐畏欲啼
號年建世後月餘乘白蓋小車與崇及尚書一人
相隨向鄭北渡渭水即此處也城南山北有五部
神廟東南向華岳廟前有碑後漢光和四年鄭縣

令河東裴畢字君先立蘇林曰戲邑名在新東南三十里孟康曰乃水名也今戲亭是也昔周幽王悅褒姒姒不笑王乃擊鼓舉烽以徵諸侯至無寇褒姒乃笑王甚悅之及犬戎至王又舉烽以徵諸侯諸侯不至遂敗幽王於戲水之上身死於酈山之北故國語曰幽滅者也漢成帝建始二年造延陵爲初陵以爲非霸曲亭南更營之鴻嘉元年於新豐戲鄉爲昌陵縣以奉初陵永始元年詔以昌陵卑下客土踈惡不可爲萬歲居其罷陵作令吏民反故徙將作大匠解延年燉煌關中記曰昌陵在霸城東二十里取土東山與粟同價所廢巨萬積年無成即此處也戲水又北分爲二水並注渭水水又東冷水入焉水南出肺浮山蓋麗山連麓而異名也北會三川統歸三壑歷新槃新豐兩原之間北流注于渭渭水又東首水南倒虎山南總五水單流注逕秦步宮高東世名立市城歷新豐原東而北逕步壽宮西又北入渭渭水又東得西陽水又東得東陽水並南出廣鄉原北垂俱北入渭渭水又東石橋水會故泥水也水南出馬嶺山北流逕武平城東按地理志左馮翊有武城縣王莽之栢城也石橋水又逕鄭城東水有故石梁述仙記曰鄭城東十四里各有石梁者也又地逕沈城北漢書地理志左馮翊有沈陽縣王莽更之曰制昌也蓋藉水以取稱矣渭水又東敷水注之水

南出石山之敷谷北逕告平城東者舊所傳言武
王伐紂告太平於此故城得闕名非所詳也敷水
又北逕集靈宮西地理志曰華陰縣有集靈宮武
帝起故張昶華嶽碑稱漢武慕其靈築宮在其後
而北流注于渭渭水又東餘水注之水南出良餘
山之陰北流入于渭俗謂之宣水也渭水又東合
黃酸之水世名之爲干渠水水南出升山北流注
于渭渭水又東逕平野城北城側枕渭濱半破淪
水南面通衝昔秦始皇之將亡也江神素車白馬
道華山下返壁於華陰平舒道曰爲遺鎬池君使
者致之乃二十八年度江所沈壁也即江神返壁
處也渭水之陽即懷德縣界也城在渭水之北池
苑之南即懷德縣故城也世謂之高陽城非矣地
理志曰禹貢北條荆山在南山下有荆渠即夏后
鑄九鼎處也王莽更縣曰惡驩渭水又東逕長城
北長澗水注之水南出太華之山側長城東而北
流注于渭水史記秦孝公元年楚魏與秦接界魏
築長城自鄭濱洛者也

又東過華陰縣北

洛水入焉闕駟以爲漆沮之水焉曹瞞傳曰操與
馬超隔渭水每渡渭輒爲超騎所衝突地多沙不
可築城婁子伯說今寒可起沙爲城以水灌之一
宿而成操乃多作縑囊以湮水夜波作城立於是
水之次也渭水逕縣故城北春秋之陰晉也秦惠

文王五年改曰寧秦漢高帝八年更名華陰王莽之華疆也縣有華山山海經曰其高五千仞削成而四方遠而望之又若華狀西南有小華山也韓子曰秦昭王令土施鈎梯上華山以節栢之心爲博箭長八尺棋長八寸而勒之曰昭王常與天神博於是神仙傳曰山中衛叔卿嘗乘雲車駕白鹿見漢武帝帝將臣之叔卿不言而去武帝誨求得其子度世令追其父度世登華見父與數人博於石上勅度世令遠山山層雲秀故能懷靈抱異耳山上有二泉東西分流至若山雨滂湃洪津泛灑挂溜騰虛直瀉山下有漢魏文帝三廟廟有石闕數碑一碑是建安中立漢鎮遠將軍段熲更修祠

堂碑文漢給事黃門侍郎張杲造杲自書之元帝又刊其二十餘字二書存重名傳於海內又刊傳中司隸校尉鍾繇弘農太守母丘儉姓名廣六行鬱然循平是太康八年弘農太守河東衛叔始爲華陰令河東裴仲恂役其逸力修立壇廟以道樹栢迄于山陰事見永興元年華百石所造碑渭水又東沙渠水注之水出南山北流西北入長安城城自華山北逕于河華嶽銘曰秦晉爭其祠立城建其左者也郭著述仙記指證魏之立長城長城在後不得言在斯爲非矣渠水又北注入渭渭水又東逕定城北西征記曰城因原土述仙記曰定城去潼關三十里夾道各一城渭水又東泥泉水

注之水出南山靈谷而泉北流注于渭水也渭水
又東合沙溝水水即符愚之水也南出符石逕新
豐縣故城北東與魚池水會水出麗山東也水本
導源東流後秦始皇葬於山北水過而曲行東注
北轉始皇造陵取土其地汙深水積成池謂之魚
池池在秦皇陵東北五里周圍四里池水西北流
逕始皇冢北秦始皇大興厚葬營建冢壙於麗戎
之山一名藍田其陰多金其陽多玉始皇貪其美
名因而葬焉斬山鑿石下涸三泉以銅爲槨旁行
周迴三十餘里上畫天文景宿之象下以水銀爲
四瀆百川五嶽九州具地理之勢宮觀百官奇器
珍寶充滿其中令匠作機弩有所穿近輒射之以

人魚膏爲燈燭取其不滅者久之後官無子者皆
使殉葬甚衆墳高五丈周迴五里餘作者七十萬
人積年方成而周章百萬之師已至其下乃使章
邯領作者以禦難弗能禁項羽入關發之以三十
萬人三十日運物不能窮關東盜賊銷槨取銅牧
人尋羊燒之火延九十日不能滅北對鴻門十里
池水又西北流水之西南有溫泉世以療疾三秦
記曰麗山西北有溫水祭則得入不祭則潤人肉
俗云始皇與神女唾之生瘡始皇謝之神女爲出
溫水後人因以燒洗瘡張衡溫泉賦序曰余出麗
山觀溫泉浴神并嘉洪澤之普施乃爲之賦云此
湯也不使灼人形體矣池水又逕鴻門西又逕新

豐縣故城東故麗戎地也高祖王關中太上皇思東歸故象舊里制茲新邑立城社樹枌榆令街庭若一分置豐民以實茲邑故民之爲新豐也漢靈帝建寧三年改爲都鄉封段熲爲侯國後立陰槃城其水際北城出謂是水爲陰槃水又北絕漕槃溝注于渭渭水又東逕鴻門北舊大道北下坂下坂名也古有鴻寧漢書高祖將見項羽楚漢春秋曰項王在鴻門亞父曰吾使人望沛公其氣衝天五色相繆或似龍或似雲非人臣之臣可誅之漢高祖會項羽范增目羽羽不應樊噲杖盾撞人入食豕肩於此羽壯之郡國志曰新豐縣東有鴻門亭者也郭緣生或云霸城南門曰鴻門也項羽將

因會高祖危高祖羽仁而弗斷范增謀而不納項伯終護高祖以獲免旣抵霸上遂封漢王按漢書注鴻門在新豐東十七里則霸上應百里按史記項伯夜馳告張良良與俱見高祖仍使夜返考其道理不容得爾今父老傳在霸城南門數十里於理爲得按緣生此記雖歷覽史漢述行涂逕凡可謂學而不思矣今新豐縣故城東三里有坂長二里餘塹原通道南北洞開有同門狀謂之鴻門孟康言在新城東十七里無之蓋指縣治而言非謂地也自新豐故城西至霸城五十里霸城西十里則霸水西二十里則長安城應劭曰霸水上地名在長安東二十里即霸城是也高祖舊停軍處東

去新豐既近何由項伯夜與張良共見高祖乎推此言之知緣生此紀乖矣渭水又東石川水南注焉渭水又東戲水注之水出麗山馮公谷東北流又北逕麗戎城東春秋晉獻公五年伐之獲麗姬於是邑麗戎男國也姬姓秦之麗邑矣又北右總三川逕鴻門東又北逕戲亭東應劭曰戲弘農湖縣西界也地隔諸縣不得爲湖湖西如此一里即李夫人塚塚形三成世謂之茭陵夫人兄延年知音尤善歌舞帝愛之每爲新聲變曲聞者莫不感動常侍上起舞歌曰北方有佳人絕世而獨立一顧傾人城再顧傾人國寧不知傾城復傾國佳人難再得上曰世豈有此人乎平陽主曰延年女弟

上召見之妖麗善歌舞得幸早卒上憫念之以厚禮葬悲思不已賦詩悼傷故渠又東逕茂陵縣故城南武帝建元二年置地理志曰宣帝縣焉王莽之宣成也故渠又東逕龍泉北今人謂之溫泉非也渠北故坂此即龍淵廟如淳曰三輔黃圖有龍淵宮今長安城西有其處黃蓋宮之遺也故渠又東逕姜原北渠北有漢昭帝平陵東南去長安七十里又東逕平陵縣故城南地理志曰昭帝置王莽之廣利也故渠之南有竇氏泉北有徘徊廟又東逕漢大將軍魏其侯竇嬰冢南又成帝延陵南陵之東北五里即平帝康陵坂也故渠又東逕渭陵元帝永元四年以渭成壽陵亭原上爲初陵詔

不立縣邑又東逕哀帝義陵南又逕惠帝安陵南
陵北有安陵縣故城也地理志曰惠帝置王莽之
嘉平也渠側有杜郵亭又東逕渭城北地理志曰
縣有蘭池宮秦始皇微行逢盜於蘭池今不知所
在也又東逕長陵南亦曰長山也三秦記曰長安
城北有平原廣數百里民井汲巢居井深五十丈
秦名天子冢曰山漢曰陵故通曰山陵矣風俗通
曰陵者天生自然者也今王公墳隴稱陵春秋左
傳曰南陵夏后臯之墓也春秋說題辭曰丘者墓
也冢者種也種墓也羅倚於山分卑尊之名者也
渭水又東逕下邳縣故城南秦伐邾置邾戎於此
有上邳故加下也渭水又東與竹水合南出竹山

北逕郿加谷歷廣鄉原東俗謂之大赤水北流注
于渭渭水又東得白渠口大始二年趙國中大夫
白公奏穿渠引涇水口起谷口出於鄭渠南名曰
白渠民歌之曰由于何所池陽谷口鄭國在前白
渠在後即水所始也東逕宜春城南又東南逕池
陽城北枝瀆出焉東南逕藕原下逕鄠縣故城北
東南入渭今無水白渠又東枝渠出焉東南逕高
陵縣故城北地理志曰左輔都尉治王莽之千春
也大康地記謂之曰高陸也車頻秦書曰符堅建
元十二年高陸縣民穿井得龜大二尺六寸背文
負八卦古字堅以石爲池養之十六年而死取其
骨以問吉凶名爲客龜大卜佐高夢客龜言我將

歸江南不遇死於秦曾於夢中自解曰龜三萬六千歲而終終必亡國之徵也爲謝玄破於淮肥自縊新城浮圖中秦祚因即淪矣又東逕櫟陽城北史記秦獻公二年城櫟陽自雍徙居之十八年雨金於是處也項羽以封司馬忻爲塞王按漢書高帝關中始都之王莽之師高也後漢建武二年封驃騎大將軍景丹爲侯國丹讓世祖曰富貴不還故鄉如衣錦夜行故以封卿白渠又東逕秦孝公陵北又東南逕居陵城北蓮芍城南又東注金氏陂又東南注于渭故漢書溝洫志白渠首起谷口尾入櫟陽是也今無水故渠又東逕漢丞相周勃塚南塚北有弱夫塚故渠東南謂之周氏曲又東

南逕漢景帝陵南又東南注于渭今無水渭水又東逕霸縣北與高陵分水水南有定陶恭王廟傳太后陵元帝崩傳昭儀隨王歸國稱定陶太后後十年恭王薨子代爲王徵爲太子太子即帝位立恭王寢廟于京師比宣帝父悼皇故事元壽元年傳后崩合葬渭陵潘岳關中記漢帝后同塋則爲合葬不共陵也諸侯皆如之恭王廟在霸城西北廟西北即傳太后陵不與元帝同塋渭陵非謂元帝陵也蓋在渭水之南故曰渭陵也陵與元帝齊者謂同十二丈也王莽奏毀傳太后塚塚崩壓殺數百人開棺梟聞數月公卿在位皆阿莽旨入錢帛遣子弟及諸生四夷凡十餘萬人操持作具助

將作掘傅后塚二旬皆平周棘其處以爲世戒今其處積土猶高世謂之增墀又亦謂之增阜俗亦謂之成帝初陵處所未詳也渭水又逕平阿侯王譚墓北塚次有碑左則涇水注之渭水又東逕鄠縣西蓋隴西郡之鄠徒也渭水又東得白渠枝口又東與五丈渠合水出雲陽縣石門山謂之清水東南流逕黃嶽山西又南入役襍縣歷原南出謂之清水口東南流絕鄭渠又東南入高陵縣逕黃白城西本曲梁宮也南絕白渠屈而東流謂之曲梁水又東南逕高陵縣故城北東南絕白渠瀆又東南入萬年縣謂之五丈渠又逕藕原東東南流注于渭水

又東過鄭縣北

渭水又東逕巒都城北故潘邑殷契之所居世本曰契居蕃闕駟曰蕃鄭西然則今巒城是矣俗名之赤城水曰赤水非也符健入秦據此城以亢杜洪小赤水卽山海經之灌水也水出石脆之山北逕蕭加谷於孤相原西東北流與愚水合出英山北流與招水相得水亂流西北注于灌灌水又北注于渭

又東過灃陵縣北霸水從縣西北流注之

霸者水上地名也古曰滋水矣秦穆公霸水更名滋水爲霸水以顯霸功水出藍田縣藍田谷所謂多玉者也西北有銅公水次東有輕谷二水合而

西注之又西流入渥水渥水又西逕嶢關北歷柳
嶢城東西有二城魏置清渥軍於城內世亦謂之
清渥城也秦二世三年漢祖入自武關攻秦趙高
遣將距於嶢關者也土地記曰藍田縣南有嶢關
地名嶢柳道通荊州晉地道記曰關當上洛縣西
北渥水又西北流入霸霸水又北歷藍田川逕藍
田縣也竹書紀年梁惠王三年秦子向命爲藍君
孟子向之故邑也川有漢臨江王榮冢景帝以罪
徵之將行祖於江陵北門車軸折老父泣曰吾王
不及矣榮至中尉郅都急切責王王年少恐而自
殺葬於是川有鷲數萬銜土置塚上百姓矜之霸
水又左合澮水歷白鹿原東即霸川之西故芷陽

矣史記秦襄王葬芷陽者也是謂之霸上漢文帝
葬其上謂之霸陵上有四出道以瀉水在長安東
南三十里故王仲宣賦詩云南登霸陵岍迴首望
長安漢文帝嘗欲從霸西馳下峻坂表益攬轡於
此處上曰將軍怯也益曰臣聞千金之子坐不垂
堂百金之子立不倚衡聖王不乘危今馳不測如
馬驚車敗柰高廟何上乃止霸水又北長水注之
水出杜縣白鹿源其水西北流謂之荆溪溪水又
西北左合狗枷川水水有二源西川上承礪山之
斫槃谷次東有苦谷二水合而東北流逕風涼源
西關上圖曰麗山之西川中有阜名曰風涼原在
礪山之陰雍州之福地卽是原其水傍溪北注原

上有漢武帝祠其水名合東川水出南山之石門
谷孟谷次東又大谷次東有雀谷東有土門谷五
水北谷西北歷風涼原東又北與西川會原爲二
水之會亂流北逕宣帝許后陵東而北去杜陵十
里斯於是有狗枷之名川東亦曰白虎原也上
有狗枷三秦記曰麗山西有白鹿原原上有狗
枷堡襄公時有大狗來下有賊則狗吠之故一
堡無患故川得厥目烏川水又北逕杜陵東元帝
初元元年葬宣帝杜陵北去長安五十里陵之西
北有杜縣故城秦武公十一年縣之漢宣帝元康
以杜東原上爲初陵更名杜縣爲杜陵也王莽之
饒安也其水又北注荆溪荆溪又北入霸縣又有

溫泉入焉水發自原下入荆水亂流注于霸俗謂
之澆水非也史記音義文帝出安門注云在霸陵
縣在故亭即郡國志所謂長門亭也史記云霸澆
長水也雖不在祠典以近咸陽秦漢都注渭長水
盡得比大川之禮昔文帝居霸陵北臨厠指新豐
路示慎夫人曰此走邯鄲道也因使慎夫人鼓瑟
上自倚瑟而歌悽愴悲懷顧謂羣臣曰以北山石
爲郭用紵絮斲陳漆其間豈可動哉釋之曰使其
中有可欲雖錮南山猶有隙使無可欲雖無石郭
又何戚焉文帝曰善拜廷尉韋昭曰高岍夾水爲
厠今斯原夾二水也廚門其內有長安廚官在事
故城曰廚門也如淳曰今名廣門也第三門本名

杜門亦曰利城門王莽更名進和門臨水亭其水有客舍故民曰客舍門又曰洛門也凡此諸門皆通達九達三途洞開隱以金堆周以林木左出右入爲徒之經行者升降有上下之別漢成帝之爲太子元帝嘗急召之太子出龍樓門不敢絕馳道西至直城門方乃得度上恠遲問其故以狀對上悅乃著令令太子得絕馳道也渭水東合昆明故渠渠上承昆明池東口東逕河池北亦曰女觀陂又東合沈水亦曰漕渠又東逕長安縣南東逕明堂南舊引水爲辟雍處在縣鼎路門東南七里其載上圓下方九宮十二室四嚮五色堂北三百步有靈臺是漢平帝永始四年立渠南有漢故圓丘

成帝建始二年罷雍五時始祀皇天上帝於長安南郊應劭曰天郊在長安南卽此也故渠之北有白亭博望苑漢武帝爲太子立使通賓客從所好也太子巫蠱事發斫杜門東出史良娣死葬於苑北宣帝以爲戾園以倡優千人樂思后園廟故亦曰千鄉故渠又東而北屈逕清明外與沈水枝渠會渠上承沈水於章門西飛渠引水入城東爲倉池池在未央宮西池中有漸臺漢兵起王莽死於此臺又東逕未央宮北高祖在關東令蕭何成未央宮何斬龍首山而營之山長六十餘里頭於渭尾達樊川頭高二十丈尾漸下高五六丈土色赤而堅云昔有黑龍從南山出飲渭水其行道因山

成跡山卽基闕不假築高出長安城北有玄武闕
卽北闕也東有倉龍闕闕內有閭闔正車諸門未
央殿東有宣室玉堂騏驎含章白虎鳳皇朱雀鶴
鸞昭陽諸殿天祿石渠騏驎三閣未央宮此卽桂
宮也周十餘里內有明光殿走狗臺栢梁臺舊乘
複道用相逕道故張衡西京賦曰鈞陳之外各有
窮隆長樂與明光逕北通于桂宮故渠出二宮之
間謂之明渠也又東歷武庫北舊樗里子葬於此
樗里子名疾秦惠帝異母弟也滑稽多智秦人號
曰智囊葬於昭王廟西渭南陰鄉樗里故俗謂之
樗里子也我百歲後是有天子之宮夾我墓穴以
昭王七年卒葬于渭南章臺東至漢長樂宮在其

東未央宮在其西武庫直其墓秦人嘖曰力則任
鄙智則樗里子也明渠又東逕漢高祖長樂宮北
本秦之長樂宮也周二十里殿前列銅人殿西有
長信長秋永壽永昌諸殿殿之東北有池池北有
層臺沼謂是池爲酒池非也故渠北有樓漢京兆
尹司馬文預碑故渠又東出城分爲二渠卽漢書
所謂王渠者也蘇林曰王官家渠也猶今御溝矣
晉灼曰渠名也在城東霸門外一水逕楊橋下卽
青門橋也側城北逕鄧艾祠西而北注渭無今水
其一渠東逕奉明縣廣城鄉之廣明苑南史王孫
及王夫人葬於郭北宣帝遷苑南史王孫及王夫
人卜以爲悼園益園民千六百家立奉明縣以奉

二園園在東都門昌邑王賀自霸御法駕郎中令龔遂參乘至廣明東都門是也故渠東北逕漢太尉夏侯嬰冢西葬日柩馬悲鳴輕車罔進下得石槨銘云于嗟滕公居此室霸水又北會兩川又北故源左出烏霸水又北逕王莽九廟南王莽地皇元年傳徵天下工匠壞撤西苑建章諸宮館十餘所取材瓦以起九廟竿及吏民以義入錢穀助成九廟廟殿皆重屋太初祖廟東西南北各四十七高十七丈餘廟半之爲銅薄櫨飾以金銀雕文窮極百工之巧褫高增下功費數百巨萬卒死者萬數霸水又北逕枳道在長安縣東十三里王莽九廟在其南漢世有白鷺羣飛自東都門過于枳道

呂后祓除於霸上還見倉狗戟脅於斯道也水上有橋謂之霸橋地皇三年霸橋木災自東起卒數千以水沉沃救不滅晨熾多盡王莽惡之下書曰甲午火橋乙未立春之日也予以神明三年終冬絕滅霸駁之橋欲以興成新室統一長存之道其名霸爲長存橋霸水之北左納漕渠絕霸右出焉東逕霸城北又東逕于楚陵北皇甫謐曰秦莊王葬于芒蕩之麗山京兆東南霸陵山劉向曰莊王大其名立墳者也戰國策曰莊王字異人更名子楚故世人猶以子楚名陵又東逕新豐縣右會故渠上承霸水東北逕霸縣故城南漢文帝之霸陵漢縣也王莽更之曰水革魏故帝黃初元年徙長

安金狄重不可致因留霸城南人有見薊子訓與父老共摩銅人曰正見鑄此時計爾曰以近五百年矣故渠又東北逕劉更始塚西更始二年爲赤眉所殺故謂侍中劉恭夜取往而埋之光武使司徒鄧禹收葬於霸陵縣更始尚書僕射行大將軍事鮑永持節安集河東聞更始死歸世祖累遷司隸校尉行縣逕更始墓遂下拜哭盡哀而去帝問公卿大中大夫張湛曰仁不遺舊忠不忘君行之高者帝乃釋又東北逕新豐縣又合漕渠漢大司農鄭當時所開也以渭難漕命齊水工徐伯乃發卒穿渠引渭今源自昆明池南傍山原東至于河且田且漕大以爲便今霸水又北逕秦虎圈東列士傳曰秦昭王會魏王魏王不行使朱亥奉璧一雙秦王大怒置朱亥虎圈中亥瞑目視虎皆裂血出踐虎虎不敢動卽是處也霸水又北入于渭水渭水又東會成國故渠渠魏尚書左僕射衛臻征蜀所開也號成國渠引以澆故田其瀆土承汧水於陳倉東東逕郿及武功槐里縣北渠左有安定梁巖塚碑碣尚存逕漢武帝茂陵南故槐里之茂鄉也應劭曰武帝與自爲陵在長安西北八十餘里漢武帝故事曰帝崩後見形爲陵令薛平曰吾雖失勢猶爲汝君奈何令吏卒上吾陵磨刀劍乎自今已後可禁之平頓首謝因不見推問陵傍果有方石可以爲礪吏卒常盜磨刀劍霍光欲斬之

張安世曰神道茫昧不宜爲法乃止故阮公詠懷
詩曰失勢在須臾帶劍上吾丘陵之室故遂葬焉
塚在城東八里飲馬橋南四里故時人謂之馬塚
故渠又北分爲二渠東逕虎圈南而東入霸一水
北合渭今無水

東入于河

春秋之渭汭也左傳閔公三年虢公敗犬戎于渭
隊服虔曰隊謂汭也杜預曰水之隈曲曰汭王肅
云汭入也呂忱云汭者水相入也水會卽船司空
所在矣地理志曰渭水東至船司空入河服虔曰
縣名都官三輔黃圖有船庫官後改爲縣王莽之
船利者也

水經卷第十九

